



REPUBLIKA E SHQIPËRISË
KËSHILLI I LARTË GJYQËSOR

VENDIM
Nr. 35, datë 28.01.2021

PËR
NUMRIN E KANDIDATËVE QË DO TË PRANOHEN NË PROGRAMIN
E FORMIMIT FILLESTAR PRANË SHKOLLËS SË MAGJISTRATURËS,
PËR VITIN AKADEMIK 2021-2022

Këshilli i Lartë Gjyqësor, bazuar në nenin 85, pika 1 dhe nenin 262, të Ligjit nr.115/2016, “Për organet e qeverisjes së sistemit të drejtësisë”, i ndryshuar, në nenin 29, pika 1, të Ligjit nr.96/2016, “Për statusin e gjyqtarëve dhe prokurorëve në Republikën e Shqipërisë” i ndryshuar, në nenin 53, pikat 2, 3 dhe 9, në nenin 55 pika 1, si dhe nenin 56, pikat 2 dhe 3, të Ligjit nr. 98/2016, “Për organizimin e pushtetit gjyqësor në Republikën e Shqipërisë”, me propozim të Komisionit për Zhvillimin e Karrierës,

V E N D O S I:

1. Përcaktimin e numrit të kandidatëve magjistratë/profili gjyqtar dhe i kandidatëve këshilltarë dhe ndihmës ligjorë, që do të pranohen në programin e formimit fillestar pranë Shkollës së Magjistraturës, për vitin akademik 2021-2022, si më poshtë:
 - a. Numri i kandidatëve magjistratë/profili gjyqtar, që pas kalimit të testimit profesional, do të pranohen në programin e formimit fillestar pranë Shkollës së Magjistraturës, për vitin akademik 2021-2022, është 35 (tridhjetë e pesë).
 - b. Numri i kandidatëve këshilltarë dhe ndihmës ligjorë, që pas kalimit të testimit profesional, do të pranohen për të ndjekur për një periudhë prej nëntë muajsh programin e formimit fillestar pranë Shkollës së Magjistraturës, për vitin akademik 2021-2022, është 20 (njëzet), të ndara 4 për kandidatët këshilltarë ligjorë dhe 16 për kandidatët ndihmës ligjorë.
 - c. Në rast se, në përfundim të procedurës së aplikimeve për pranimin në formimin fillestar, nuk ka kërkesa që plotësojnë numrin e planifikuar të kandidatëve këshilltarë dhe ndihmës ligjorë, kuotat e parashikuara në shkronjën “b” do t’i shtohen kandidatëve magjistratë/profili gjyqtar.
 - ç. Në rast se, në renditjen përfundimtare të testimit profesional ka konkurrentë mbi numrin 60 (gjashtëdhjetë), që sipas Rregullores së Brendshme të Shkollës së Magjistraturës kanë arritur pikët e nevojshme për kandidatët magjistratë, kuotat e planifikuara për në pikën 1, shkronja “b” mund t’i shtohen numrit të përgjithshëm të kandidatëve magjistratë/profili gjyqtar. Në çdo rast numri i kandidatëve të shtuar magjistratë/profili gjyqtar nuk mund të kalojë numrin e planifikuar sipas pikës 1, shkronja “b” të këtij vendimi.
 - d. Në rast se nga konkurrentët nuk arrihen pikët që nevojiten për kandidatët magjistratë, kuotat e mbetura mund t’i shtohen numrit të përgjithshëm të kandidatëve këshilltarë dhe ndihmës ligjorë, të cilët plotësojnë nivelin minimum të pikëve që parashikohen në Rregulloren e Brendshme të Shkollës së Magjistraturës.

2. Shkolla e Magjistraturës publikon thirrjen për kandidime për formimin fillestar, brenda një jave kalendarike nga data e publikimit të numrit maksimal të kandidatëve magjistratë/profili gjyqtar, sipas pikës 1, shkronja “a”, të këtij vendimi, nëpërmjet shpalljes së njoftimit:
 - i) në faqen zyrtare të Këshillit të Lartë Gjyqësor dhe Shkollës së Magjistraturës;
 - ii) në të paktën një prej gazetave me tirazh më të lartë në vend.
3. Procesi i regjistrimit për konkurrim të kandidatëve magjistratë/profili gjyqtar, bëhet në Shkollën e Magjistraturës dhe vlerësimi paraprak për plotësimin e kriterëve kryhet sipas rregullave të parashikuara në Ligjin “Për statusin e gjyqtarëve dhe të prokurorëve në Republikën e Shqipërisë”.
4. Shkolla e Magjistraturës njofton kandidatët e interesuar për këshilltarë dhe ndihmës ligjorë për paraqitjen e kërkesave për formim fillestar, nëpërmjet njoftimeve të publikuara:
 - i) pranë gjithë gjykatave;
 - ii) në faqet zyrtare të gjykatave, të Këshillit të Lartë Gjyqësor dhe të Shkollës së Magjistraturës.
5. Afati për paraqitjen e kërkesave për formim fillestar, nga kandidatët e interesuar për magjistratë/profili gjyqtar, si dhe për këshilltarë dhe ndihmës ligjorë, është deri më datë 29 shkurt 2021.
6. Për tu pranuar në provimin e pranimit për formimin fillestar për këshilltar dhe ndihmës ligjor, kandidati duhet të plotësojë njëkohësisht kriteret e përgjithshme dhe të veçanta, si më poshtë:

Kriteret e përgjithshme:

- a) të jetë shtetas shqiptar;
- b) të ketë zotësi të plotë për të vepruar;
- c) të zotërojë gjuhën shqipe, të shkruar dhe të folur;
- ç) të jetë në kushte shëndetësore që e lejojnë të kryejë detyrën përkatëse;
- d) të mos jetë i dënuar me vendim të formës së prerë për kryerjen e një krimi apo për kryerjen e një kundërvajtjeje penale me dashje;
- dh) të mos jetë larguar nga detyra për shkaqe disiplinore, si dhe të mos ketë masë disiplinore në fuqi;
- e) të mos ketë qenë anëtar, bashkëpunëtor ose i favorizuar nga Sigurimi i Shtetit përpara vitit 1990;
- ë) të mos ketë qenë bashkëpunëtor, informator, ose agjent i shërbimeve sekrete;
- f) të mos jetë anëtar i partive politike në kohën e kandidimit.
- g) të ketë përfunduar ciklin e dytë të studimeve universitare për drejtësi, me diplomë “Master i shkencave”, ose të barasvlershëm me të, sipas përcaktimeve të legjislacionit të arsimit të lartë, referuar nenit 124 të ligjit nr. 80/2015, “Për arsimin e lartë”;
- gj) të ketë notë mesatare të përgjithshme mbi 7 (shtatë), si dhe notë mesatare mbi 7 (shtatë) për grupin e lëndëve kryesore, ku përfshihen: E drejta civile dhe e detyrimeve, E drejta penale, (Pjesa e përgjithshme dhe pjesa e posaçme), Procedura civile, Procedura penale, E drejta administrative dhe E drejta kushtetuese. Për të diplomuarit “Juristë”, në programe në gjuhë të huaj, parashikohet një koeficient vështirësie i barabartë me 1.2, i cili do të ponderojë mesataren e tyre faktike.

Kriteret e veçanta për këshilltar ligjor:

- a) të ketë përvojë profesionale jo më pak se 10 vjet si nëpunës i lartë në sistemin gjyqësor ose të prokurorisë, në administratën publike, profesionet e lira ligjore, mësimdhënie në fakultetet e drejtësisë, ose në çdo pozicion tjetër të barasvlershëm me to, në sektorin privat ose organizatat ndërkombëtare;
- b) të ketë njohuri në jurisprudencën e gjykatave vendase dhe atyre ndërkombëtare;

- c) të ketë njohuri shumë të mira të paktën të një gjuhe të vendeve të Bashkimit Europian;
- ç) të ketë aftësi të shkrimit dhe arsyetimit ligjor;
- d) të jetë autor i artikujve dhe botimeve shkencore në fushën e jurisprudencës.

Kriteret e veçanta për ndihmës ligjor:

- a) të kenë përvojë profesionale jo më pak se pesë vjet, duke përfshirë së paku tre vjet përvojë pune profesionale që lidhet me gjykatën.
7. Në dosjen personale për regjistrim, kandidati për këshilltar dhe ndihmës ligjor duhet të paraqesë dokumentet e mëposhtme, ose kopje të tyre të noterizuara:
- a) kërkesën personale, ku të parashtrijë shkaqet e motivimit për të ndjekur programin e formimit fillestar për këshilltar ose ndihmës ligjor, shoqëruar me fotokopjen e kartës së identitetit;
 - b) jetëshkrimin;
 - c) deklaratën ku të garantojë vërtetësinë e dokumentacionit që paraqet;
 - ç) diplomat universitare dhe pasuniversitare për studimet që ka ndjekur, si dhe vërtetimin e notave;
 - d) vetëdeklarimin për gjendjen gjyqësore;
 - dh) raportin mjeko-ligjor për aftësimin e tij të përgjithshëm dhe të specializuar në kuadër të kryerjes së detyrës si këshilltar apo ndihmës ligjorë në sistemin e drejtësisë;
 - e) dëshmi, vërtetime nga punëdhënësi/t dhe nga organet e sigurimeve shoqërore, që vërteton përvojën/përvojat e punës;
 - ë) dëshmi, vërtetime nga punëdhënësi/t, që vërtetojnë se nuk është larguar nga detyra për shkaqe disiplinore, si dhe nga punëdhënësi i fundit, që vërteton se nuk ka masë disiplinore në fuqi;
 - f) deklaratë që nuk është anëtar i partive politike në kohën e kandidimit;
 - g) deklaratë që nuk ka qenë anëtar, bashkëpunëtor ose i favorizuar nga Sigurimi i Shtetit përpara vitit 1990;
 - gj) deklaratë që nuk ka qenë bashkëpunëtor, informator, ose agjent i shërbimeve sekrete.
 - h) dëshmi, diplomë, që vërteton zotërimin e një gjuhe të vendeve të Bashkimit Europian (vetëm kandidati për këshilltar ligjor);
 - i) deri në tre dokumente, që vërtetojnë pasjen e aftësi të shkrimit dhe arsyetimit ligjor, si dhe qenien autor të artikujve ose botimeve shkencore në fushën e jurisprudencës (vetëm kandidati për këshilltar ligjor).
8. Procesi i regjistrimit për konkurrim i kandidatëve këshilltarë dhe ndihmës ligjorë kryhet në bashkëpunim me Shkollën e Magjistraturës.
9. Kandidatët këshilltarë dhe ndihmes ligjorë që plotësojnë kriteret, i nënshtrohen konkursit të pranimit, duke paguar tarifën e regjistrimit për pjesëmarrjen në konkurs sipas Rregullores së Brendshme të Shkollës së Magjistraturës.

Ky vendim hyn në fuqi në datën e botimit në faqen zyrtare të internetit të Këshillit të Lartë Gjyqësor.

PËR KËSHILLIN E LARTË GJYQËSOR